



Vahidin Šahinpašić / DIDIER TORCHE

Uskoro rješavanje složenih predmeta

Vahidin Šahinpašić iz **SIPA** podsjetio je na ostvarene rezultate i najavio nove akcije i hapšenja

Milionske su zarade koje su ostvarili osumnjičeni za međunarodnu trgovinu ljudima i navođenjem na prostituciju, koji su uhapšeni u akcijama Twins i Pismo, rekao je jučer Vahidin Šahinpašić, šef **SIPA** Odsjeka za sprečavanje i otkrivanje organizovanog kriminala, dodajući da postoji razlog što nekima od uhapšenih nije određen pritvor.

Podsjetimo, pritvor je određen za pet, a mjere zabrane za četiri uhapšena u ovim akcijama. Šahinpašić navodi da je u predmetu Twins u BiH uhapšeno osam osoba, u Srbiji tri, dok se u Njemačkoj i Austriji ispituje veći broj žrtava, odnosno djevojaka iz Srbije i BiH koje su prebacivane u Austriju i Njemačku i

kojima je u početku nuđena enormna zarada, anonimnost te koje su potom bile izložene okrutnim prijetnjama i teroru, a potom zlorabljavane u lancu trgovine ljudima. Sličan scenarij je korišten i u predmetu Pismo, pri čemu su djevojke iz Ukrajine posredstvom organizatora u BiH prebacivane u zemlje zapadne Evrope.

“Može se očekivati da ćemo u narednom periodu riješiti određene predmete koje smatramo veoma složenim, a radi se o kriminalnim grupama čija krivična djela diraju u osjećaje svakog građanina ove zemlje”, poručio je Šahinpašić, navodeći da se to, prvenstveno, odnosi na krivična djela koja karakterišu brutalnost i sila.

D. P.